

PHM -

Filemon

Sagi tə, Polə nə púpúní v pa

Filemon

nə

Filemon sagi tə yuu wa sugu

Lìù tə, v nə púpúní sagi ku tə

Ku yi *tuntunu Polə nə púpúní ku. Máná tə wa, v nə púpúní sagi ku tə, də v yi v wulə bán dìè wa *Romə nə.

Lìù tə nə, v nə púpúní

Sagi ku yi Polə nə púpúní, v pa Filemon nə. Filemon yi Polə nə dí yáá v swìn suywánú tə v biri wá, ku pa v jì *Kərisə lìù.

Sagi tə wa sugu

Nəŋə ku tə yiri, Polə nə púpúní v nə: Onezimə yi Filemon yonɔ, v nə nan v con v dəri. U vəli Polə con, v kə v waa Zwezi-*Kərisə nə.

Onezimə dān wulə v saŋa Polə nə, v pa ba swìn Zwezi-Kərisə suywánú tə. Yá Polə dān ken v sírí, sə v pa, Onezimə pìí v va v pa Filemon nə. Polə pìà v biri wá sagi ku tə wa də, Kərisə lìà tə mama yi nubɪa Kərisə yiri, də ba nə ti ba tiàn, nə à yèə də ba nə yi ywəŋə. U dān lòrì Filemon, sə v sè v ja Onezimə ndə v nubiu nə, v nə swə wá zənzən.

Polə jònì Filemon

(2 Timote 1.3-5, 3 Zwan 2, 6)

¹ À mù Polə wulə bàń diè wa, à nə twá Zwezi-*Kərisə nə yırı. À mù də Timote, ʋ nə yı nə nubiu Kərisə yırı nə, púpúní sagı ku tə. Nə pın ku n mù Filemon nə. N yı nə nubiswənə, n ga yı nə tutundon. ² Nə pìà, sə sagı tə yí Apıa də, ʋ nə yı nə nakua Kərisə yırı. Nə pìà, sə ku yí Arəswipə də, ʋ nə yı nə tutundon. U də saɲa nəba, ʋ jaɲa Yu tutuɲı tə wa. Nə pìà, sə ku yí Kərisə lià púlí tə də, ku nə wulə n mù Filemon sàń nə. ³ Nə nyına Yu də nə *Yuu-Tiu Zwezi-Kərisə nə wá fwa pubwanv á yıra, ba ga pa aba bıcan sié. ⁴⁻⁵ À nì n sonu tə yoo, ba nə swìn də, n swə lià tə mama, ba nə yı Kərisə nə ti. À ga nì n waa tə, n nə keni Yuu-Tiu Zwezi nə wuuu tə yoo, nə yı nətu. Ku mù yırı, à kəni à nyına Yu lèè mánjá mama, yá à líí n yoo à yijunı mama wa. ⁶ N kəni n waa Yuu-Tiu Zwezi nə. Yá ku dǎń pın nə yı won nədu. À dǎń lǝrì Yu, sə ku nətu tə wǎní ku pa n lwarı wozəɲə tə, Yu nə pın nəba, sə nə ma pa dun Zwezi-Kərisə nə, nə luv wulu wa. ⁷ À nubiu, à pǝí à na pupwən nəfarv, à bıcan ga zǝrì n sonu tə yırı. Ku twá də n mù, lià tə mama, ba nə yı Kərisə nə ti, jǝń ma dǎn.

Polə lwè Filemon nə Onezimə yırı

(Kolosa tián 4.7-9, 1 Korentə tián 13.4-7)

⁸ À mù Polə jə yoo, à nə pìà, sə à lǝrì mú ku yırı. N tətə yèé də, à jə cwəɲə Zwezi-*Kərisə yırı, sə à bırı mú ku tə nə mɛ, sə n fwa. ⁹ Yá à dǎń nə pìà, sə à bırı won tə, à nə lǝrì n con də sonu. À yı bazuvv, à ga wulə bàń diè wa, à nə twá Zwezi-Kərisə nə yırı. ¹⁰ À lwè n nə, sə n sè Onezimə*f1*. U ken ʋ waa Zwezi nə, mánjá tə wa, ʋ nə twi à con bàń diè tə wa. U dǎń jigə à biú Zwezi yırı. ¹¹ U yı liù tə, mánjá don wa, ʋ nə wà nywarı jın ʋ pa mú. Sıún nə, ʋ dǎń jə nywarı ʋ pa n mù də à mù mama nə. ¹² Yá à dǎń pın, ʋ pǝí ʋ biàn n con nə. U jigə ndə à mù Polə tətə yıra tə vǎn don nə. ¹³ N yèé də,

ba vwə nə də banzala, Zwezi-Kərisə sɔyɰwánú tə yɪɾɪ. Ku mù nə pɪn, à yà sóní, sə à pa v mé à con, v san nə, v fwa ku tə, n yà nə mɛ, sə n fwa. ¹⁴ À dàń yà nə wà sóní, sə à tun yoo mama, də n nə ba ku swə. À pìà, sə zəni tə mama, n nə wá fwa à yɪra, sə ku ya də n tətə fɪra. ¹⁵ Ku wàá ku yanɪ də, n mù də Onezimə yà pwè duən nə mánjá mancɪn wa, sə á pìí á ya də duən mánjá mama wuuu. ¹⁶ Mánjá tə, v nə twi n con, n dàń ja wá ndə n nubiu nə, n nə swə. N kúù dàń ká ja wá ndə yonɔ nə. À mù swə wá zənzən. N mù con nə, v yoo dàń mɛ, sə ku ya càn ku doni. N də dàń mɛ, sə n sóní wá, v nə yɪ ləzwənə, v ga yɪ lìù tə, v nə yɪ n nubiu *Yuu-Tiu yɪɾɪ. ¹⁷ Də n cígá nə jələ nə ndə n dabɛɛ nə, sə n sè Onezimə, ndə ku yɪ à tətə nə twi n con. ¹⁸ Də v yà nə tun mú lwanɪ, nə à yèé v nə mɛ, sə v ɲwín won v pa mú, kə tə yìèn təntə mama à mù yuu wa. ¹⁹ À mù Polə tətə nə púpúní yìèn tə tə də à tətə juɪn: À wá ɲwín mú won tə mama, Onezimə nə mɛ, sə v pa mú. Yá ku tà à mù nə wá swìn n con də, n də tətə jə à juɪɪ. Ku mù nə yɪ n tətə mu tə. ²⁰ À nubiu, cígá mama, tun ku yoo təntə n pa nə, Yuu-Tiu yɪɾɪ. Tun ku nətu n pa nə, sə à wàní à na pupwən Kərisə yɪɾɪ. ²¹ À yèé də, n wá zìlí à nii. Ku mù nə pɪn, à púpúní n nə. Yá à yèé də, ku tə, n nə wá fwa, ku wá doni ku tə tətə, à nə swìn n con.

²² Ku nə sùrí lá, tanɪ diè n tún à nə. À jə yala də, á yɪjɔnɪ tə wá san nə, sə à pìí à bà á con.

Sagɪ tə yígúré sùràn

²³ Epafərasə jònɪ mú. À mù də v mù mɛ, nə wulə bàń diè tə wa, Zwezi-*Kərisə yɪɾɪ. ²⁴ À mù, də Marəkə, də Arisətarəkə, də Demasə, də Likə nə tuɲa duən nə. Ba də mama jònɪ mú. ²⁵ Nə *Yuu-Tiu Zwezi-Kərisə nə wá fwa pubwanv á pubuɲa wa.